

B. N. C.
FIRENZE

1 2 3 2

6



1232.6









M. ANTONII FLAMINII PA-
raphrasis in triginta Psalmos uersibus scripta.

Ad Alexandrum Farnesium Cardinalem amplissi-
mum.



LVTETIAE,
Ex officina Roberti Stephani typographi Regii
M. D. XLVI.



1222.6



3 ^{II}

ALEXANDRO FARNESIO

Cardinali amplissimo M. Antonius Flaminius

S. P. D.

MEMINI amplissime Farnesi, nonnullos & illos quidē non indoctos, cum ego Dauidem inter poetas præstantissimos numerarem, uehementer mirari solitos, neque adduci unquam potuisse, ut hoc meum iudicium approbarent: quod quidem ego ea re fieri existimabam, quia Davidis carmina, quæ de Græco, uel Hebræo leguntur expressa, sua uerborum elegantia, suisque numeris carent. quocirca mihi non semel in mentem uenerat tentare, possēntne ea Latinis uersibus illustrari: uerum id ne facerem, magnitudine negotii, & imbecillitate uoletudinis deterrebar. Cū uerò postea grauioribus studiis occupatus poeticis exercitationibus plurimam salutem dixissem, multo etiam magis eam cogitationem abieceram, hoc autem tempore nihil minus à me præstari posse iudicabam (iam enim octauus annus est, cum ego non uersus modo facere desii, sed ne poetam quidē ullum Græcum, uel Latinum legi) ut minime dubitandum mihi fuerit, quin ipsa, siqua tamen unquam fuit in me, orationis poeticæ facultas penitus exaruisset. Verum superioribus diebus cum tu per literas id à me postulasses, quod ego, quāquam nihil magis cupiebam, efficere non potui: dubitarēque, ne tibi, cui singularem quandam obseruantia, & omnia maxima studia debeo, ea res offensionem aliquam, aut commutationem uoluntatis attulisset: tantam ex ea suspicione molestiam æpi, ut à me elegiam subito magnitudo doloris expresserit, quam

A. ij.

statim ad te nisi, nonnullam spem habens fore ut hoc munusculū, qualecunque esset, me tecum, si fortè alienior factus fores, reduceret in gratiam. Eam elegiam cum legisset Aloisius Priulus, uir summa mihi necessitudine coniunctus, Quin tu, inquit, mi Flamini, quando huiusmodi uersus tā subito fundis, aliquot ex hymnis Davidis hac eadem scribendi ratione exornas, & tuorum carminum decimas Deo consecras? multaque alia in hanc sententiam, quibus uir pius, & literarū diuinarum amantissimus recusantem, & huc atque illuc tergiversantem ita urisit, ut tandē his uiginti notis triginta psalmorum paraphrasim uersibus confecerim: plurium certē confecturus, si per ualeitudinem mihi licuisset. Ut enim tecū pro tua singulari humanitate loquar familiariter, illud scire debes, ita rationē ingenii mei comparatam esse, ut non nisi de nocte in tenebris uersus ego facere possim: ut mihi aut hac exercitatione penitus abstinendum sit, aut certē uigilandum. ex qua quidem re etiam factum est ut breuiiores quosque psalmos oratione illustrādos susceperim: quippe qui longo usu doctus exploratissimum haberem (quæ ingenii mei est intemperantia) quencunque psalmum aggressus forem, non intermissurum, quoad illum ad finem usque perducerem: id quod profecto sine magno uitæ periculo in psalmis longioribus facere non potuisssem: lux enim meditantem ferè semper oppressisset. Cæterum cum ipse mecum cogitarem, te magna ex parte occasionem dedisse, ut ego hoc opusculum confecerim, omnino faciendum existimaui, ut ipsum ad te potissimum mitterem, præsertim cum & tu, quemadmodum iuuenem literis elegantissimis ex-

politum deat, poetarum lectione delecteris, & ego ma-
 ximis tuis beneficiis obligatus omni studio contendere
 debeam, ne uidear ingrati animi uitio laborare. Ac-
 cipies igitur hoc paruum munusculū uersibus concin-
 natum: qui si spiritum, & magnificentiam orationis
 Dauidicæ minus exprimere uidebūtur, non me tamen
 laboris mei ualde pœnitebit. confido enim fore, ut ali-
 quis alius exemplo meo prouocatus, quod ego fortasse
 parum fœliciter conatus sum, id ipse Deo iuuante sum-
 ma cum laude perficiat. Vale. Tridenti Pridie Non.
 Februar.

DE DAVIDE IYDAEORVM REGE.

Eram paterna abiectus in domo puer,
 Cunctisque fratribus meis
 Minor pusillum in monte pascebam gregem.
 Hic ego sub umbris arborum,
 Dum læta tondet gramina pecus, maximi
 Laudes canebam numinis,
 Sonora tangens fila citharæ, quam meæ
 Parvæ laborarant manus.
 At ille sanctus cœlitum Rex, et Pater,
 Qui summa tangit fulmine
 Corusco, humoque gaudet ima tollere,
 Suum repente muntium
 Ad parva misit tecta, qui meum sacro
 Liniret unguento caput.
 Abiecit ille viribus præstantia
 Fratrum meorum corpora,
 Nec forma quicquam profuit, nec asperis
 Spectata virtus præliis:
 At ego pusilli parvulus custos gregis
 Ad regium decus efferor.

M. A N T O N I I F L A M I N I I P A -
raphrasıs in triginta Psalmos uersibus scripta.

A R G V M E N T V M P S A L M I I.

Docet, pios, ac legum diuinarum studiosos, & amantes, beatos existere: contráque, omnes improbos, & Dei contemptores, miseros esse.

P S A L. I.

Beatus vir, qui non ambulauit in consilio impiorũ,
 & in via peccatorum non stetit, & in cathedra derisorum non sedit:

Sed in lege Domini volũtas eius, & in lege eius meditabitur die ac nocte.

Et erit tanquam lignum, quod plantatum est secus decursus aquarum, quod fructum suum dabit in tempore suo,

Et foliũ eius non defluet, & omnia, quæcunque faciet, prosperabuntur

Non sic impii, sed tanquam puluis, quem proiicit ventus.

Ideo non stabunt impii in iudicio, neque peccatores in concilio iustorum:

Quoniam nouit Dominus viam iustorum, & iter impiorum peribit.

Dum nigra iucundos per languida membra sopores

Nox irrigat mortalium,

Tu mecum tacitis hymnos meditare sub umbris

Cantu Latino barbite

Iesseo quondam heroi modulate, tyranno

Qui siue pulsus à fero

Montibus in solis erraret, siue reuersus

In patriam ditissimas
 Vrbes, & latos populos ditione teneret,
 Noctes, diésque maximo
 Cælicolum regi laudes cantare solebat.
 At uos beati cælites,
 Est tutela quibus natum commissa piorum:
 Adeste quæso dexteri,
 Et quæcunque Syros docuit rex optimus olim,
 Per Italas urbes lyra
 Dum memorare iuuat, facilem concedite cantum,
 Rebusque dignum maximis.

P A R A P H R A S I S.

Beatus ille, qui nec audit impios,
 Nec persequeratur improbus
 Peccare, nec lætatur irrisoribus
 Se pessimis adiungere:
 Sed mente pura diligit leges Dei,
 Illasque semper cogitat,
 Seu nox sopore amabili, seu lumine
 Sol candido terram irrigat.
 Qualis perennes orta propter riuulos
 Arbor feraces ramulos
 Ornat quotannis fructuum lætissima
 Pulcherrimorum copia,
 Summumque honorem seruat omni tempore
 Densis amictu frondibus:
 Talis piorum est uita, talis omnium
 Colentium leges Dei.
 Hi quicquid unquam molientur, exitus
 Illo fauente prosperos

9
Habebit. haud sic improbi, sed pulverem
Vt turbo late difficat,
Sic iactat illos impetus libidinum,
Nulloque consistunt loco.
Ergo supremi iudicis cum venerint
Tribunal ad iustissimum,
Causa cadentes, à bonorum candida
Turba procul miserrimi
Trudentur ima in tartara: quoniam Deus
Mores piorum diligit:
At turpiter qui uitam agit, cruciatibus
Hunc sempiternis afficit.

ARGUMENTVM PSAL. III.

Queritur de rebellionē populi, & spe diuini auxilii
animum suum confirmat.

Psalmus Dauid, cum fugeret à facie Absalom
filii sui. I I I.

Domine quid multiplicati sunt, qui tribulant me:
multi insurgunt aduersum me,
Multi dicunt animæ meæ, nō est salus ipsi in Deo.
Tu autem Domine protector meus es, gloria mea,
& exaltans caput meum.
Voce mea ad Dominum clamaui, & exaudiuit me
de monte sancto suo.
Ego cubabo, & dormiam, meque excitabo, quia Do-
minus sustentat me,
Non timebo millia populi circundantis me. exur-
ge Domine, saluum me fac Deus meus,
Quoniā tu percussisti omnes inimicos meos in ma-
xilla, dentes peccatorum contriuisisti.

Domini est salus, & super populum tuum benedictio tua.

P A R A P H R A S I S.

Pater beate, quid esse causæ existimem,
 Cur impio bello furens
 Me persequatur immerentem ciuitas?
 Meam salutem perditam,
 Et derelictam populus à tua pater
 Benignitate prædicat.
 Sed quisque, quod lubet, loquatur, tu decus,
 Certumque præsidium meum es.
 Nunquam fidem tuam pia inuoco precæ,
 Quin uocibus dexter meis
 Aures benignas præbeas, & supplicii
 Optata dones omnia.
 Ergo quietæ mente utramuis dormiam
 In aurem, & hostium nūnas
 Ridebo uanas. nullus ullo tempore
 Belli tumultus, aut ferox
 Me præliorum territabit impetus,
 Non si trecentis militum
 Me uallet hostis millibus, & undique
 Mortem minentur omnia.
 Exurge uindex scelerum, & hostium feram
 Compeſcæ uim crudelium,
 Qui sæpe, sæpiusque me grauissimis
 Iam liberaſti caſibus.
 Tu perdidisti saulem, & omnes impios,
 Qui belluarum immanium
 Instar salutem, & sanguinem meum hiantibus

*Sæui appetebant faucibus.
Solus salutem, solus ô dulcissime
Pater bona omnia sufficis,
Solus colentibus piè numen tuum
Æterna donas gaudia.*

ARGUMENTVM PSAL. VI.

Existimant Dauidem fecisse hos versus, cum in morbum, & grauiissimas calamitates incidisset ob stuprum Bersabeæ illatum, & maritum eius crudeliter interemptum.

Victori in Neginoth super Seminith Psalmus
Dauid

V I.

Domine ne in furore tuo arguas me, neq; in ira tua corripas me.

Miserere mei Domine, quoniã infirmus sum: sana me Domine, quoniam cõturbata sunt ossa mea. Et anima mea turbata est valde, sed tu Domine vsquequo?

Conuertere Domine, & eripe animam meam, saluũ me fac propter misericordiam tuam.

Quoniam nõ est in morte qui memor sit tui, in inferno autem quis confitebitur tibi?

Laboraui in gemitu meo, lauabo per singulas noctes lectum meũ, lachrymis meis stratum meum rigabo.

Caligauit præ amaritudine oculus meus, inueterauit propter omnes inimicos meos.

Discedite a me omnes, qui operamini iniquitatem, quoniam exaudiuit Dominus vocem fletus mei. Exaudiuit Dominus deprecationem meam, Dominus orationem meam suscepit.

Erubescant, & conturbentur vehementer omnes inimici mei, conuertantur, & erubescant valde velociter.

P A R A P H R A S I S.

Ne quæso Domine me tuus furor opprimat,
Néue ira sæuiat tua:

Sed qui pater mihi es, paternæ filium
Seueritate punias.

Miserere Domine iam mei, iam tristibus
Aurem querelis admoue:

Nam dira morbi uis misellum conficit,
Me uita destituit mea.

Et tu quousque differes opem tuam
Meæ salutis negligens?

Quousque uultum iratus auertes tuum?
Tuo benigno lumine

Meos dolores intueri iam pater,
Malisque tantis eripe.

Quid me, oro, morte rapere tam cita iuuat?
Ecquid sepulchro conditus

Tui memor ero? ecquid tuas amabili
Cantabo laudes carmine?

Si cæde me, & lectum meum libidine
Contaminaui sordida,

At lachrymarum me, meumque lectulum
Lauabo largo flumine:

Me nulla nox, me nulla lux in posticum
Non lachrymantem uiderit,

Quamquam satis, superque supplicii datum est,
Mærore iam contabui,

Fletuque fessa perdidit iam lumina,
 Peccata perditus mea,
 Iniuriâque meorum acerbis hostium
 Dum flere nunquam desino.
 Recedite procul impij, recedite
 Malas in oras: nam Deus
 Suspirijs, lachrymisque motus est meis.
 Dominus pias preces meas
 Benignus audiuit, salutem supplicij
 Donauit optimus Pater.
 Ergo erubescant, & dolore pessimi
 Rumpantur hostes, & meæ
 Fœlicitati quisquis inuidet, procul
 Fugiat metu perterritus.

ARGVMENTVM PSAL. XI.

Colloquitur cum amicis, qui fugam ipsi suadebant, ne per insidias à Saule circūueniretur, quibus ille respondet, rerum omnium moderatorem, & dominum esse Deū, neque sine eius prouidentia quicquam geri ab hominibus: quare innocētes bono animo esse debere, improbis autem certā perniciem expectandam esse.

Victori David, psalmus

XI.

In Domino confido, quomodo dicitis animæ meæ
 vt transmigret è monte vestro sicut passer?
 Quoniam ecce peccatores intenderunt arcum, para-
 uerunt sagittas suas super neruum, vt sagittent in
 obscuro rectos corde.
 Quoniam fundamenta dissipata sunt, iustus autem
 quid fecit?

Dominus in templo sancto suo , Dominus in cælo
sedes eius:

Oculi eius respiciūt, palpebræ eius explorant filios
hominum.

Domin⁹ examinat iustum, impium autem , & eum
qui diligit iniquitatem, odit anima eius.

Pluet super peccatores carbones : ignis, & sulphur,
& spiritus procellarum pars calicis eorum.

Quoniam iustus Dominus iustitias diligit, rectum
aspicit vultus eius.

PARAPHRASIS.

- Da.* Deo mea spes nititur, quid dicitis,
Vestris ut auolem procul
A montibus, misella sicut auicula,
Quam sæuus accipiter feris
Adurget unguibus, fame rabida furens?
- Ami.* Quia hostis ecce barbarus
Arcum tetendit iam, suas ut imbuat
Tuo sagittas sanguine,
Et dissipatis legibus, miseris nihil
Ad spem salutis linquitur.
- Da.* At ego quid egi, cur meam uitam mihi
Auferre tendat impius?
Sed præsidet templo Deus sancto, Deus
Cælum beatus incolit:
Hinc perspicaci cuncta lustrat lumine
Rerum omnium arbiter parens,
Sua ut potente dextera bonos inuuet,
Malosque iustus puniat.
Explorat ille sæpe rebus asperis
Pios, ut aurum feruidus

Explorat ignis, opprimi tamen uetat.

Contraque tempus ad breue

Florere permittit malos, cruciatibus

Quos deinde longis afficit.

Quapropter hostis impius nisi iam suo

Ponit furori terminum,

Prædico, funditus peribit obrutus

Ignem, procellis, sulphure.

Nanque æquus æquitatem amat Deus, & pios

Placido intuetur lumine.

ARGVMENTVM PSAL. XII.

Queritur de moribus sæculi sui deprauatis : Deo supplicat pro salute piorum, qui ab improbis vexantur: ipsum Deum inducit loquentem, & opem suam pollicentem.

Victori ad Seminith, psalmus

XII.

Saluum me fac Domine, quoniam defecit sanctus,
quoniam defecerunt fideles inter filios hominum.

Vana loquuntur unusquisque ad proximum suum,
fictæ blandiuntur, in corde & corde loquuntur.

Disperdat Dominus uniuersa labia fictæ blanditiæ,
linguam magniloquam.

Qui dixerunt, Linguis nostris magnificabimur, labia
nostra penes nos sunt, quis noster Dominus est?

Propter vastitatem inopum, & gemitum pauperum
nunc exurgam, dicit Dominus,

Saluabo illos ab iis, qui laqueum ponunt ipsis.

Eloquia Domini eloquia munda, argentum igne examinatum
in vase terreo, purgatum septies.

Tu Domine seruabis eos, & custodies nos à genera-

tionem hac in æternum.
In circuitu impii ambulant, cū exaltata fuerint op-
probria filiorum hominum.

P A R A P H R A S I S.

Benigne cælitum Pater serua obsecro,
Opemque fer: paucissimi
Nam sunt, quibus confidere, ac possim meam
Tuto salutem credere.
Mendacio iam pulsa turpi ueritas
Recessit alma ab urbibus,
Fidesque, sanctusque pudor, et soror illius
Synæritas amabilis.
Quod si quis unquam blandiatur, et omnia
Loquatur ore dulcia,
Tu uerò ab illo tibi potissimum caue.
Te lingua blanda ab improbo
Auellat ore præpotens rerum Deus,
Tu, magna qui semper loqui
Gaudes, eum iratum, tuæque uindictam
Linguae proteruæ sentias:
Tu, qui furore percitus, Lingua mea
Opes mihi et potentiam
Dicis parabo, liberum os gero, et geram
Semper, quis imperat mihi?
At hæc nefandus dum nefaria euomit,
Cælestium Rex maximus
Orationis impiæ iactantia
Commotus, Exurgo iam, ait,
Exurgo, iamque opem salutare affero
Benignus afflictis, mihi,

Qui uexat illos, impius pœnas dabit.

Synœra uerba numinis,

Aurôque puriora sunt purissimo,

Quod igne sæpe, ac sæpius

Purgauit artifex, monile regio

Sponso laborans nobile.

Tu gente nos ab impia rex optime

Seruabis, & clementiæ

Scuto tuæ firmissimo tela hostium

Longe repelles omnia.

Tuti uagantur improbi, & bonis malam

Pestem, dolôsque comparant,

Contaminata mente cum uir urbibus,

Seruare dignus, imperat.

ARGUMENTVM PSAL. XIII.

Vir sanctus magnis, ac diuturnis calamitatib⁹ vexatus vicem suam miseratur, & auxilium Dei queribundus implorat.

Victori, psalmus Dauid

XIII.

Vsquequo Domine obliuisceris me in perpetuum?

vsquequo auertis faciem tuam à me?

Quandiu ponam consilia in anima mea, dolorẽ in corde meo per diem?

Vsquequo exaltabitur inimicus meus super me? respice, & exaudi me Domine Deus meus.

Illumina oculos meos, ne vnquam obdormiam in morte: ne fortè dicat inimic⁹ meus, Præualui aduersus eum.

Qui tribulant me, exultabunt si motus fuero: ego autem in misericordia tua speraui.

B.i.

Exultabit cor meum in salutari tuo. cantabo Domino, qui bona tribuit mihi.

P A R A P H R A S I S.

Quousque Domine linquor in tantis malis?
 O columen, et salus mea,
 Quousque pergis esse non memor mei?
 Dic oro, quandiu dies,
 Noctesque lachrymis madebo, et anxius
 Deliberando distrahar?
 Quousque supplicem tuæ clementiæ
 Crudelis hostis opprimet?
 Aures tuæ satis diu Pater à meis
 Abhorruere questibus,
 Satis, superque vultus auersus tuus
 Omnem mihi lucem abstulit.
 Iam quæso, iam candore luminis sacri
 Meas tenebras dissipa:
 Ne forte durus mortis obrepit sopor,
 Dum nulla donatur quies.
 Ne quæso ne amplius in mala insultans mea
 Triumphet hostis gaudio:
 Sed quanquam ab omnibus misera salus mea
 Proiecta sit mortalibus,
 Bonam tamen spem non ego abiiciam, tuæ
 Nitens opis fiducia.
 Pater beate maximas tibi gratias
 Ago, tuum qui supplicem
 Tam dexter audis, et malorum fluctibus
 Tantis benignus eripis.
 Iam iam querelas flebiles, suspiria

19

*Iam pono lætus tristia,
Et fonte quicquid carminis fluet meo,
Pater tibi omne confecro.*

ARGUMENTVM PSAL. XV.

Præcipit genti suæ, quam viuendi rationem sequi debeât, vt Deo chari sint, & sublato omni exteriorum metu in finibus patriæ securi conquiescant.

Psalmus David XV.

Domine quis peregrinabitur in tabernaculo tuo?
aut quis requiescet in monte sancto tuo?
Qui ingreditur sine macula, & operatur iustitiam.
Qui loquitur veritatem in corde suo, qui non detraxit lingua sua,
Nec fecit proximo suo malum, & opprobrium non tulit super proximo suo:
Despicitur in oculis eius malignus, timentes autem Dominum glorificat.
Qui iurat vt se affligat, & non mutat: pecuniâ suam non dedit ad vsuram: & munera contra innocentem non accepit.
Qui facit hæc, non mouebitur in æternum.

P A R A P H R A S I S.

*Pater supreme quis tuum templum incollet?
Dic, oro, monte quis acquiescet in tuo?
Qui purus omni à labe iustitiam colit,
Qui diligenter curat, ut mentem mala
A cogitatione seruet integram,
Nec immerentes ore uexat improbo,
Nec alteri nocere solummodo cauet,*

David.

Deus.

B. ij.

*Sed si quis ullum lædat, auxilio uenit,
 Iniuriæque prohibet. hic malum, licet
 Ditissimum, licet potentem, negligit.
 At quos amantes uiderit Deum, colit,
 Veretur, obseruat, loco quanquam infimo
 Iacere ærnat rerum egentes omnium:
 Nec, si quid unquam iuret, unquam peierat.
 Non ille fœnori pecuniam daret:
 Illædne reciperet licet pauperrimus,
 Ut innocentes opprimat, uel maximam.
 Qui seruat hæc, immobilis semper manet,
 Deoque charus uiuit, & mortalibus.*

ARGUMENTVM PSAL. XXIII.

Gloriatur, se ac sua omnia Deo curæ esse, & demonstrat, quàm beati sint ii, qui iuste cum fide ac pietate vitam degunt, & sese in seruitutem Deo dicant.

Psalmus David

XXIII.

Dominus pascit me, nihil mihi deerit, in loco pascuæ me collocauit.
 Iuxta aquas refrigerii ducit me, animam meam conuertit.
 Deduxit me super semitas iustitiæ propter nomen suum.
 Etiam si ambulauero per vallem umbræ mortis, nõ timebõ mala, quoniam tu mecum es.
 Virga tua & baculus tuus, ipsa me consolata sunt.
 Paraisti in conspectu meo mensam aduersus eos, qui tribulant me.
 Impinguasti in oleo caput meũ, & calix meus exu-

berans est. Sed & bonitas,
 Et misericordia tua subsequenter me omnibus die-
 bus vitæ meæ,
 Et habitabo in domo Domini in longitudine die-
 rum.

P A R A P H R A S I S.

Rex cælitum est pastor meus,
 Nihil boni deerit mihi.
 Vberimis in pascuis,
 Amœna propter flumina
 Me spiritus sanctissimi
 Aura beata recreat,
 Dulciq; mentem pabulo
 Nutrit suæ scientiæ.
 Miserrimus animus meus
 Dum longius abit à Deo,
 Errauerat procul à uia,
 Quæ ducit ad cælestium
 Oras beatas. at Deus
 Meæ misertus miseriæ,
 Benignitate maxima
 Quæsiuit illum ultro, et sui
 Reduxit ad caulam gregis:
 Si sola solus per loca
 Inermis eam, ubi plurima
 Imago mortis territat,
 Interritus perrexero
 Custode securus Deo.
 Me uirga, pastor optime,
 Coeræt errantem tua,
 Ne grauius offendar cadens,

Tuo bacillo fulcior.
 Me mensa roborat tua,
 Me dulcis exhilarat calix
 Tuis, oleo foueor tuo.
 Nec me pater dulcissime
 Per has inexplicabiles
 Vias euntem deseres
 Vnquam, sed ad tuam domum
 Duces, ubi vita fruatur
 Et sempiterno gaudio.

ARGVMENTVM PSAL. XXX.

Gratias agit Deo, grauissimo morbo liberatus.

Psalmus Cantici dedicationis domus Da-
 uid xxx.

Exaltabo te Domine, quoniam exaltasti me, nec de-
 lectasti inimicos meos super me.
 Domine Deus meus clamaui ad te, & sanasti me.
 Domine eduxisti ab inferno animam meam, salua-
 sti me à descendantibus in foueam.
 Psallite Domino sancti eius, & confitemini memo-
 riæ sanctitatis eius:
 Quoniam momentum est in ira eius, & vita in be-
 neuolentia eius.
 Vespere demorabitur fletus, & ad matutinum tem-
 pus lætitia.
 Ego autem dixi in prosperitate mea, non mouebor
 in æternum.
 Domine in volūate tua præstiteras monti meo for-
 titudinem.
 Auertisti faciem tuā à me, & factus sum cōturbatus,

Ad te Domine clamaui, & ad Deum meum deprecatus sum.

Quæ utilitas in sanguine meo, si descendero in corruptionem?

Nunquid confitebitur tibi puluis, aut annuntiabit veritatem tuam?

Audi Domine, & miserere mei, Domine esto adiutor meus,

Conuertisti planctum meum in gaudium mihi, cōscidisti saccum meum, & circūdēdisti me lætitia.

Propterea cantabit tibi gloria mea, & nō filebit: Domine Deus meus in æternum confitebor tibi.

P A R A P H R A S I S.

Te semper efferam pater sanctissime

Cantu meorum carminum,

Qui me tenebris inferorum, & horrida

Lethi extulisti ianua.

Tua benignitate perfectum est, meis

Ne risus hostibus forem.

Domine pia prece inuocatus tabido

Morbum expulisti corpore.

Iam iam sub imas ire terras cœperat

Mœrens anima, iam nexibus

Soluta chari corporis dulcissimas

Linquebat oras ætheris,

Cum restituta uiuere, & iussa est frui

Lucis cupito munere.

Adeste castæ uirgines, homines pijs

Adeste, mecum laudibus

Deum benignum tollite, agite gratias,

Quantas potestas maximas

Incomparabili illius clementiæ.

Vt uerè nimbus uuido

Vix ortus euanescit, Aquilonis feri

Si spiritus superuenit,

Sic ira sancti numinis breuissima est.

At illius benignitas

Semper salutem, semper hominibus pijs

Synæra præbet gaudia.

Quòd siquid unquam incommodi interuenerit,

Deo fauente celeriter

Multiplicatis commodis rependitur.

Verum ipse uictis hostibus,

Et constituta pacæ, cum mihi omnia

Fæliciter succederent,

Demem ad hunc modum loquebar, nulla uis,

Me nulla iam potentia

Deicere poterit hoc statu rerum optimo.

Tu scilicet regnum meum,

Measque fortunas ita stabiliueras,

Vt montis instar omnibus

Habere uisa sint. at hoc nulla mihi

Virtute contigerat mea:

Sed liberalitate maxima tua,

Quod ne mihi ignotum foret,

Illamque stultam opinionem ut ponerem,

Paulisper auersus mihi

Memet reliquisti Domine, sùntque illico

Mutata, uersaque omnia.

Tum lachrymans, uocisque lamentabiles

Fundens, Quid, inquam, maxime

Rex cælitum, quid uita proficiet mea

Restincta morte tam cita?
 Ecquid sepulchro lingua condita poterit
 Cantare nominis tui
 Laudes, tibiue docta dextra psallere?
 Ne, quæso, supplicis tui
 Nouissimo in casu præcæ contemptam habe,
 Sed pestilentem corpore
 Depelle morbum de meo. sic lachrymans
 Orabam: at ipse tristibus
 Aurem querelis admouens, pro lugubri
 Mœrore læta gaudia,
 Pro fœditate uestium squallentium
 Vestem dedisti candidam.
 Itaque tibi ingenium meum, et studia mea,
 Meamque vocem consacro:
 Semper tibi laudes cithara dicat mea:
 Semper tuam clementiam
 Cantabo: semper gratias tibi maximas
 Agam pater sanctissime.

ARGVMENTVM PSAL. XLII.

Exponit, in quanta sollicitudine ac dolore esset,
 cum Hierosolymis eiectus à Saule neque templum
 augustissimum cum reliquis ciuibus celebrare, ne-
 que sacrificiis solennibus interesse posset.

Victori, erudiens Canticum filiorum Core,
 psalmus XLII.

Quemadmodum desiderat seruus ad fontes aqua-
 rum, ita desiderat anima mea ad te Deus.
 Sitiuit anima mea ad Deum fortem, viuum, quan-

do veniam, & apparebo ante faciem Dei?
 Fuerūt mihi lachrymæ meæ panes die ac nocte, dū
 dicitur mihi quotidie, Vbi est Deus tuus?
 Hæc recordatus sum, & effudi in me animam meā,
 quòd transibo cum multitudine, adducens illos
 vsque ad domum Dei
 In voce exultationis & cōfessionis, multitudine tri-
 pudante.
 Quare tristis es anima mea, & quare conturbas me?
 Spera in Deum: quoniam adhuc cōfitebor illi pro-
 pter salutare vultus sui.
 In me anima mea conturbata est, propterea memor
 ero tui de terra Iordanis, & Hermonii, & à monte
 Mizaar.
 Abyssus abyssum aduocat in voce cataractarū tua-
 rum.
 Omnes fluctus tui, atque procellæ tuæ super me
 transierunt.
 In die mandabit Dominus misericordiam suam, &
 nocte canticum eius apud me,
 Oratio Deo vitæ meæ. dicam Deo, Rupes mea,
 Quare oblitus es mei, & quare contristatus incedo,
 dum affligit me inimicus?
 Quasi gladio concidunt ossa mea, dum exprobrant
 mihi inimici mei,
 Dicentes mihi per singulos dies, Vbi est Deus tuus?
 Quare tristis es anima mea, & quare cōturbas me?
 Spera in Deum: quoniam adhuc confitebor illi, qui
 est salutare vultus mei, & Deus meus.

P A R A P H R A S I S.

*Vt ærva fontem anhela quærit anxie
 Quam uis canum sagacium
 Vexauit, urit ærva dum sol igneus:*

Sic te pater dulcissime
 Desiderat anima mea, cor meum tuam
 Sic expetit præsentiā.
 O si niuea lux illa fulgeat mihi,
 Cum liceat ad templum Dei
 Adire, & hymnos numini augustissimo
 Cum gente sancta dicere.
 Noctes, diésque lachrymæ tristissimæ
 Fuere pro cibo mihi,
 Dum continenter sciscitantur impiæ
 Gentes, Deus meus ubi sit.
 Cur ille, dicunt, exulem seruum suum
 Tantis relinquit in malis?
 Iam fracta uirtus ponderi suo cumberet
 Rerum asperarum, nisi bona
 Fulciret illam spes, & animum reficeret
 Iucunda cogitatio:
 Nimirum adhuc tempus fore, cum ad amabilem
 Redibo lætus patriam.
 Tunc me meorum multitudo ciuium
 Immensa gratulantium
 Templum Dei deducet ad sanctissimum:
 Tunc ciuitas clamoribus
 Fausissimis sonabit, omnia tinnulis
 Late sonabunt plausibus.
 Ergo bona tibi tanta ô anima mea à tuo
 Promissa cum scias Deo,
 Cur non dolori iam modum figis? mihi
 Cur omne tollis gaudium?
 Committe iam, committe præsentissimo
 Tuam salutem numini:

Nam liberati ab omnibus malis adhuc
 Agemus illi gratias.
 Hæc sæpe mecum colloquor, sed intimis
 Resurgit in præcordiis
 Quandoque tanta vis doloris anxii,
 Vix ut queam resistere.
 Quapropter ad tui memoriam nominis
 Amabilem sæpissime
 Recurram ô unica spes mea, ô lux, et salus,
 Charumque solamen meum,
 Dulcæset illa amaror omnis, et animo
 Illa eluet curas meo.
 Quanquam paterna sum fugatus à domo,
 Vastisque solitudines
 Iordanis, iuiosque saltus Hermoni,
 Inhospitalem et Mizarum
 Exul peragro rerum egenus omnium:
 Nunquam tamen tui pater
 Non meminero, nunquam effluet animo meo
 Dulcissimum nomen tuum.
 Eheu dolorem urget dolor, neque ulla fit
 Laboris intermissio.
 Ut densus imber, usque sæua grandinis
 Ingente glomerati agmine,
 Cum turbulento decidunt ex æthere,
 Magnis et omne motibus
 Cælum quatit tonitruum horrifonus fragor,
 Sternuntur agri, sternitur
 Seges uirescens, rura plenis omnia
 Nature fossis rusticus
 Miratur: heu tali pater miserum agmine

Grauium malorum usque obruis.
 Sed tu serena placidus intueberis
 Me fronte tandem, & candida
 Lux pellet horridas tenebras: interim
 Manente nocte desinam
 Laudes tibi nunquam canere, numen tuum
 Nunquam precari desinam,
 Dicam tibi fletus, O salus, o lux mea
 Cur tandiu inmemor es mei?
 Cur lachrymis, dolore, luctu maceror,
 Dum uexat hostis barbarus?
 In frustra corpus omne concidunt meum,
 Et me miserrime enecant,
 Dum continenter sciscitantur impiæ
 Gentes, Deus meus ubi sit.
 Cur tristis es anima mea? cur nunquam mihi
 Per te licet quiescere?
 Committe iam, committe præsentissimo
 Tuam salutem numini,
 Nam liberati ab omnibus malis, adhuc
 Agamus illi gratias.

ARGUMENTVM PSAL. C.

Hortatur omnes mortales, & præcipue Iudæos,
 vt memores sint beneficiorum Dei, qui nos creauit,
 regit, ac tuetur, vt nūquam intermittendæ sint gra-
 tiarum actiones.

Psalmus ad laudem.

C.

Iubilare Deo omnis terra, seruite Domino in læti-
 tia:
 Introite in conspectu eius in exultatione.

Scitote, quòd Dominus ipse est Deus, ipse fecit nos,
& non ipsi nos:

Nos autè populus eius, & oues pascuæ eius. introite
portas eius in confessione, atria eius in hymnis:
confitemini illi,

Laudate nomē eius: quoniam benignus est Domi-
nus, in æternum misericordia eius, & vsque in ge-
nerationem & generationem veritas eius.

PARAPHRASIS.

Vrbes, & agri cantibus

Sonate, læta maximo

Servite mente numini,

Lætis adite plausibus

Ad atria eius aurea.

Ipse, ipse uerus est Deus,

Terræ, polique conditor:

At cæterarum gentium

Non dñ, sed aurum, & marmora.

Tu nos pater sanctissime

Tua benigna dextera

Finxisti, ouiculæ nos: tuæ

Sumus, tuæ scientiæ

Dulcissimo nos pabulo

O pastor optime nutriens,

Æterna donas sæcula

Vitam beatam ducere.

Ergo Deum canamus o

Viri, & pudicæ fæminæ,

Viri, & pudicæ fæminæ

Adite sancti ianuas

Templi sonantes dulcia
 Carmina, sonent late omnia
 Nomen Dei sanctissimum:
 Nam dulcis, & rerum omnium
 Amabilissimus est Deus.
 Absumet ignis sydera,
 Tellus peribit: at Dei
 Mirabilis clementia,
 Et ueritas semper manent.

ARGUMENTVM PSAL. CXIII.

Hortatur ad hymnos canendos Deo, prædicans eius potentiam, & prouidentiam misericordiæ plenam.

Alleluia Psalmus

CXIII.

Laudate serui Domini, laudate nomen Domini.
 Sit nomen Domini benedictum ex hoc nunc & us-
 que in sæculum.
 A solis ortu usque ad occasum laudabile nomen Do-
 mini.
 Excelsus super omnes gentes Dominus, & super cæ-
 los gloria eius.
 Quis sicut Dominus Deus noster, qui in altis habi-
 tat, & demittit se, ut aspiciat [omnia] in cælo, & in
 terra?
 Suscitans à terra inopem, & de stercore erigens pau-
 perem,
 Ut collocet eum cum principibus, cum principibus
 populi sui.
 Qui habitare facit sterilem in domo, matrem filio-
 rum, lætantem.

Adeste castæ uirgines, pueri integri
 Adeste, mecum laudibus
 Efferte nomen numinis sanctissimi.
 Dum sol per oras ætheris
 Cursu uolubili rotabitur, diem
 Aëgris ferens mortalibus:
 Minora dum micabit inter sydera
 Luna occidente iam die,
 Ab Indo ad ultima Britani littora
 illustre sit nomen Dei.
 Non uniuersis ille tantum gentibus
 sua imperat potentia,
 Sed cælites, cælique supra maximum
 se tollit altus uerticem.
 Hinc pater acuto cuncta lustrat lumine,
 Non stellifer quicquam polus:
 Non alma quicquam terra continet, neque
 Pontus, eam circumuagus:
 Nil pandit aer liquidus, occultat nihil
 Crassa inferorum obscuritas:
 Mortalis ullus denique nihil pectore
 seruat profundo conditum,
 Quod ille rector maximus cælestium
 Non ærnat omni tempore.
 Ipse & potentes mente mani lucida
 Perambulantes sydera
 Vindex ad imos usque trudit inferos,
 Et pauperes in infimo
 Gradu iacentes principum in solio locat
 sua benignus dextera.

*Ipse & pudicam liberorum garrulo
Hilarat puellam examine,
Quæ prole sine dulci, diu in tristissimo
Mœrore vitam traxerat.*

ARGUMENTVM PSAL. CXIIII.

Hymnus est elegantissimus, in quo celebrat prodigia, quæ Deus edidit, cū Hebræos ab AEgypto traduceret in regna Chananæorum.

Alleluia Psalmus

CXIIII.

Quum exiret Israel de AEgypto, domus Iacob de populo barbaro,

Factus est Iuda sanctificatio eius, Israel potestas eius.

Mare vidit & fugit, Iordanis cōuersus est retrorsum.

Montes subsilierunt vt arietes, & colles sicut agni ouium.

Quid est tibi mare, quòd fugisti? & tu Iordanis, quòd conuersus es retrorsum?

Montes cur subsiliistis sicut arietes, & colles sicut agni ouium?

A facie Domini mota est terra, à facie Dei Iacob,

Qui conuertit petram in stagna aquarum, & silicem in fontes aquarum,

PARAPHRASIS.

Quum liberata seruitute barbara

Iudæa gens AEgyptiorum finibus

Exiret, illamque Deus ipse duaret,

Fugere fluctus æquoris perterriti,

Iordanis unda retro fugit, & stupens

Gens illa vidit exilire maximos

C.i.

Montes, ut agni prata per uirentia
 Saliunt nouelli, lacte dulci ebrj.
 Quid accidit mare tibi, cur perterritum
 Fugeres? o alle fluminum quid accidit,
 Cur pavidus ad fontem recurreres tuum?
 Vos quaeso montes maximi quid impulit
 Inusitatis exilire motibus?
 Sensere magni numinis praesentiam
 Montes, et unda fluminis, et altum mare,
 Sensere dura saxa solitudinum,
 Cum his ea fontes uerteret in uberes.

De inscriptione X V hymnorum qui sequuntur.

Ter quinque, qui sequuntur, hymni cantica
 Graduum uocantur, istiusque nominis
 Quae uis in isto sit loco, iam plurimi
 Interpretantes protulere plurima,
 Sed illa sic incerta, fabulosaque,
 Ut ipse malim confiteri libere,
 Nescire me, quod nescio. tu candide
 Lector, quod istis continetur canticis,
 Dum diligenter explicamus, obsecro
 Attentum animum adhibe, tametsi inscriptio
 Quid ipsa sibi uelit, explicare non datur.
 Nam totque, tantaque poteris cognoscere
 In his poetae uersibus sanctissimi
 Vitam beatam maxime attingentia,
 Ut curiosus sis licet, animo tamen
 Aeque ferendum sit, quod unum hoc nescias.

A R G V M E N T V M P S A L. C X X.

Queritur vir sanctus, se patria pulsum, inter homines improbos & fraudulentos vitam agere.

Canticum graduum, Psalmus c x x.

Ad Dominum cum tribularer, clamaui, & exaudivit me.

Domine libera animam meam à labiis mendacii, & à lingua dolosa:

Quid dabit tibi, aut quid adiiciet tibi lingua dolosa? sagittæ potētis acutæ cum carbonibus iuniperorū.

Hei mihi quòd incolatus meus apud Mesech est, & habito cum tabernaculis Cedar, multū incola fuit anima mea

Apud eos, qui oderunt pacem. Ego vir pacis sum, & cum loquor [de pace,] ipsi ad bellum [incitantur.]

P A R A P H R A S I S.

Oppugnat hostis impius caput meum,

Meæque fortunas, ego

Contra piarum me tegam scuto precum.

Nam uocibus dexter meis

Aures amicas admouet semper Deus,

Ut filio dulcis pater:

A. iherino dente, acerbò à uulnere

Et, dolosi Domine me

Defende; sæua lingua ne uitam mihi

Suis uenenis auferat:

Dolosa lingua quem tibi fructum feret?

Quid turpibus mendaciis

Lucrabere præter odium Dei miser,

Et omnium mortalium?

*Qualis sagitta milite à fortissimo
 Contorta, qualis ignea
 Nutrita vis iuniperi olentis caudicæ,
 Talis uenenata impij
 Lingua est. Miser, miser ego iam nimium diu
 Cum gente uiuo barbara:
 Me pax iuuat, & mutui concordia
 Amoris ardens ignibus:
 At ista gens de pace cum loquor, nihil
 Crepat nisi neæm & sanguinem.*

ARGVMENTVM PSAL. CXXI.

Docet in periculis ad misericordiã Dei confugiendum esse, qui solus & possit, & velit nos incolumes conseruare, & omnibus bonis augere & cumulare.

Canticum graduum, Psalmus cxxi.

Leuaui oculos meos in mōtes, vnde veniet auxilium
 mihi.
 Auxilium meū à Domino, qui fecit cælum & terrā.
 Non dabit in commotionem pedem tuū, neque dormitabit qui custodit te.
 Ecce nō dormitabit, neque dormiet, qui custodit Israel.
 Dominus custodit te, Dominus ymbra tua ad manū
 dexteram tuam.
 Per diem sol non vret te, neque luna per noctem.
 Dominus custodit te ab omni malo, custodiet animā
 tuam Dominus.
 Dominus custodiet introitum tuum, & exitum tuum
 ex hoc nunc, & vsque in sæculum.

P A R A P H R A S I S.

Dum me cruentus urget hostis, lumina
 Montes ad altos sustuli,
 Unde ille rerum præpotens pater omnium,
 Terræ, polique conditor,
 Frustratus hostium barbarum, mittet mihi
 Opem benigno numine.
 Nunquam ille sævis impiorum incurfibus
 Tuam sinet constantiam
 Labare victam, dormiet nunquam tuæ
 Salutis ille negligens:
 Qui civitati præsidet sanctissimæ,
 Nunquam profecto dormiet.
 Hærebit ille semper ad dextrum latus
 Fidissimus comes tuum,
 Umbraculique tecum amabilis uicæ
 Fungetur optimus pater,
 Ne feruidus te tangat aut sol, aut graui
 Luna insalubris lumine:
 Quodcunque ages, ubicunque eris, domi, foris,
 In urbe, in agro, tecum erit
 Semper beatus cælitum rex, & pater,
 Fortunet ut tibi omnia:
 Suisque tandem ducet ad domos, ubi
 Æterna uives sæcula.

A R G V M E N T V M P S A L. C X X I I.

Solebant omnes tribus Hierosolyma conuenire
 ter in singulis annis ad agendos dies festos & solen-
 nes. Inducit igitur homines pios gratulantes, venis-
 C. ij.

se tempus eiusmodi conuentus, & urbem sanctā lau-
dibus celebrantes, illique omnia bona precantes.

Canticum graduum, Psal. c x x i i.

Lætatus sum, cum dicerent mihi, In domum Domi-
ni ibimus,

Stabunt pedes nostri in portis tuis Hierusalem.

Hierusalem ædificata est vt ciuitas, quæ coniuncta
est sibi ipsi simul.

Illuc ascēdunt tribus, tribus Domini, testimonium
Israel, ad confitendum nomini Domini.

Quia illic constitutæ sunt sedes ad iudicium, sedes
domus David.

Precamini pacem ipsi Hierusalem, sit bene iis qui
diligunt te,

Sit pax in mœnibus tuis, & abundantia in domibus
tuis.

Propter fratres meos, & proximos meos nunc pre-
cabor pacem tibi.

Propter domum Domini Dei nostri quæsiui bona
tibi.

P A R A P H R A S I S.

O quale æpi gaudium
Cum dicerent, Adibimus
Templum Dei sanctissimum:
Te magna uisam ciuitas
Tectis, uis, & mœnibus,
Et ciuium concordia
Florentem, & almi numinis
Tutela. agris ex omnibus,
Et oppidis gens plurima
In te piorum singulis

Annis ter ad festos dies,
 Et sacra sancta conuenit,
 Vt legibus mandat suis
 Rector supremus cœlitum:
 Tu iura claris urbibus
 Legesque das, tu maximos
 Reges alis, te Dauidis
 Proles frequentat inclyta
 Stipata semper nobili
 Turba ducum. precamini
 Ciuēs boni bona omnia
 Huic ciuitati, sit bene,
 Fœliciterque amantibus
 Te, mater alma, nec tuis
 Vnquam recedat finibus
 Pax & beata faustitas:
 Salus meorum ciuium
 Tua salute nititur:
 Templum Dei sanctissimum
 Te reddit omnibus pijs
 Amabilem. igitur usque dum
 Ego uixero, semper tibi
 Bona precabor omnia.

ARGVMENTVM PSAL. CXXIII.

Homines pii ab impiis oppressi misericordiam Domini implorant.

Canticum graduum, Psal. CXXIII.
 Ad te leuauī oculos meos, qui habitas in cœlis.
 Ecce sicut oculi seruorū ad manū dominorū suorū,
 C.iii.

Sicut oculi ancillæ ad manus dominæ suæ, ita oculi nostri ad Dominum Deum nostrum, donec misereatur nostri.

Miserere nostri Domine, miserere nostri, quia multum repleti sumus despectione,

Quia multum repleta est anima nostra derisione abundantium, & despectione superborum.

PARAPHRASIS.

At te, beatas qui beatus incolis

Oras nitentis ætheris,

Attollo lumina lachrynis manantia,

Vitæ meæ spes unica:

Iniuriosa verberatus ut manu,

Manus heriles aspicit

Flens servus, implorans opem domini sui:

Vt serva servi dextera

Pulsata, dominæ dexteram aspicit suæ:

Sic te pater sanctissime

Nos intuemur maxima fiducia,

Donec querelis tristibus

Aures benignas applicans adsis tuo

Nobis secundo numine.

Iam quæso, iam tuere supplices tuos

Vultu sereno, ista quoniam

Abominata gens sua superbia

Nos enecat miserrime,

Miserrime nos enecat gens impia

Irrisione et iurgis.

ARGUMENTVM PSAL. CXXIIII.

Gens sancta præsentis periculo mortis liberata, gra

tias agit Deo.

Canticum graduum, Psal. c x x i i i i.

Nisi Dominus fuisset in nobis, dicat nunc Israel, ni
si Dominus fuisset in nobis,

Cum exurgerent homines in nos, tunc viuos deglu
tissent nos.

Cum irasceretur furor eorum in nos, tunc aqua ab
sorbuisset nos,

Torrens trāssisset super animam nostram, tunc trās
sissent super animam nostram aquæ intolerabiles.

Benedictus Dominus, qui non dedit nos in prædam
dentibus eorum.

Anima nostra sicut passer crepta est de laqueo venā
tium: laqueus contritus est, & nos liberati sumus.

Adiutorium nostrum in nomine Domini, qui fecit
cælum & terram.

P A R A P H R A S I S.

Nisi nos benigni numinis

Tutela seruasset, pie

Nunc dicat urbis incolæ,

Nisi nos benigni numinis

Tutela seruasset, feri

Inuaderent cum barbari,

Instar leonum hiantibus

Nos deuorassent faucibus:

Cum gens ueniret impia

Furens, mindque & sanguinem

Spirans, malorum altissimo

Nos obruisset gurgite:

Torrens, malorum maximus

Agros, & urbem, & omnia

Iam perdidisset funditus.
 Supreme cælitum pater
 Te sempiternis laudibus
 Seruata tollet ciuitas,
 Quam noluiſti in manibus
 Patere prædam belluis:
 Vt implicata uinculo
 Pudica turtur, aucupis
 Crudelis effugit manum,
 Si fortè laqueus frangitur,
 Sic impiorum è dextera
 Spem præter. ipſi euasimus.
 In poſterum anxius timor
 Noſtris facſſat finibus,
 Quando omnium rerum potens,
 Terræ, poliſque conditor
 ſuo benigno numine
 Noſtræ ſaluti conſulit.

ARGVMENTVM PSAL. CXXV.

Deſcribit ſecuritatem eorum, qui omnes ſuas ſpes collocant in Deo.

Canticum graduum, Pſal. CXXV.

Qui confiſunt in Domino, ſicut mons Sion immo-
 bilis in ſæculum manens. Hieruſalem
 Môtes habet in circuitu ſuo, & Dominus eſt in circui-
 tu populi ſui ex hoc nunc, & vſque in ſæculum.
 Quia non relinquet Dominus virgam peccatorum
 ſuper ſortem iuſtorum, vt non extendant iuſti ad
 iniquitatem manus ſuas.

Benefac Domine bonis, & rectis corde,
Declinantes autem ad prauitates deducet Dominus
cum operantibus iniquitatem. pax super Israel.

P A R A P H R A S I S.

Quicumque uerè spes suas locat in Deo,
Immobilis semper manet
Sionis instar, nulla quem suo potest
Mutare uis unquam loco.
Vt sancta uallo montium circumdata
Est undecunque ciuitas,
Sic ipse rector cœlitum dextro pios
Vallabit usque numine,
Illosque nullis improborum uiribus
Premi diutius sinet,
Ne fortè uirtus fracta rebus asperis
Deo recedat à suo.
Fac affluenter manet ad bonos tua
Quæso benignitas Pater.
At qui secutus impiorum pessima
Consilia deserit uiam
Legum tuarum perditus, illum precor
Vltriâ puni dextera.
Vtinam quies, & alma pax nostros agros,
Nostras & urbes incolat.

A R G V M E N T V M P S A S. C X X V I.

Describit lætitiâ gentis Hebrææ è Babylone domum redeuntis.

Canticum graduum, Psal. c x x v i.
Cum conuerteret Dominus captiuitatem Sion, facti

sumus sicut somniantes:
 Tunc repletum est risu os nostrum, & lingua nostra
 exultatione.
 Tunc dicebant inter gentes, Magnifice fecit Domi-
 nus cum istis,
 Magnifice fecit Dominus nobiscum, facti sumus læ-
 tantes.
 Reduc Domine captiuitatem nostram sicut torrètes
 in Austro.
 Qui seminant in lachrymis, in exultatione metent:
 Euntes ibant, & flebant mittentes semina sua:
 Venientes autem venient cum exultatione, portan-
 tes manipulos suos.

P A R A P H R A S I S.

Quum liberati barbaræ gentis iugo
 Dulcè rediremus domum,
 Se somniare quisque, non uero frui
 Existimabat gaudio:
 O quæ uoluptas, quanta nobis commoda
 Tuo fauente numine
 Tum contigere cœlitum rex maxime:
 Tum barbarus mirans ait,
 En quanta pro salute gentis istius
 Pater deorum conficit:
 Et magna certè fecit, haud iniuria
 Tanto exilimus gaudio.
 Ut Auster udus imbrium uim maximam
 Fundens, iugisq; collium
 Nivem albicantium liquans suas super
 Ripas alit torrentia
 Flumina, uagantur illa, latèq; omnia

Tenent: ita pater optime
 Fac, ut tuorum multitudo ciuium
 Plenis uis ad patriæ
 Dulces fluat agros, omniâque passim occupet,
 Lætoque plausu repleat.
 Ut glareoso tristis aruo semina
 Mandans colonus uberem
 Si fortè messem percipit, gaudet magis,
 Quàm cultor agri fertilis:
 Sic nos per annos septies denos grauem
 Et seruitutem, & cætera
 Passi mala omnia, cum lares amabilis
 Reuiferemus patriæ,
 Cunctis uicissim gaudijs inæssimus,
 Tuæque rex sanctissime
 Benignitati gratias semper agimus,
 Sempérque habemus maximas.

ARGVMENTVM PSAL. CXXVII.

Docet, & domus, & familiæ, & ipsius ciuitatis salu-
 tem, & custodiam in vnius Dei prouidentia consti-
 tutam esse, & ab eodem victum & cultum omnibus
 suppeditari.

Canticum graduum, Psalmus CXXVII.

Nisi Dominus ædificauerit domum, in vanum la-
 borauerunt qui ædificant eam.
 Nisi Dominus custodierit ciuitatem, frustra vigilat
 qui custodit eam.
 Vanum est, vos ante lucem surgere, & tardare sessio-
 nem manducantes panem dolorum.

Sic dabit dilectis suis somnum, ecce hæreditas Domini filii, merces fructus ventris.

Sicut sagittæ in manu potentis, ita filii iuuentutis.

Beatus vir qui impleuit pharetram suam ex ipsis, nõ confundetur, cū loquentur inimicis suis in porta.

P A R A P H R A S I S.

Nisi coniugem Deus bonam, & agrum fertilem,

Dulcēque donet liberos,

Frustra laborat, si quis hæc studio suo

Sese paraturum putat.

Nisi ciuitatem, & ciuium concordiam

Defendat optimus Pater,

Et ciuitatem, & ciuium concordiam

Frustra tuentur principes:

Frustra ad labores ante lucem surgitis,

Frustra laboratis diem

Totum, labores nisi Deus uestros suo

Fortunet ipse numine.

Ipse & parabilem facit uictum, & p̃s

Præbet quietem ciuibus:

Ipse & frequentat liberis domum: & ipsius

Vxor pudica munere

Contingit, ac decora, & optimis simul

Ornata proles moribus:

Talisque robore, qualis à fortissimo

Sagitta torta milite.

Beatus ille, qui pharetram talibus

Implet sagittis, non ei

Erit timendum, si quod unquam euenerit

Certamen, illum iudicēs,

*Et cuncta ciuitas, suis cum filijs
Bonum & beatum prædicant.*

ARGVMENTVM PSAL. CXXVIII.

Prædicat, in summa rerum prosperitate vitam a-
cturum, quicumque Deum piè, sanctèque coluerit.

Canticum graduum, Psal. cxxviii.

Beati omnes, qui timent Dominum, qui ambulant
in viis eius:

Labores manuum tuarum quia manducabis, beatus
es, & bene tibi erit.

Vxor tua sicut vitis abundans in laterib⁹ domus tuæ.

Filii tui sicut nouellæ oliuarum in circuitu mensæ
tuæ.

Ecce sic benedicetur homo qui timet Dominum.

Benedicet tibi Dominus ex Sion, & videbis bona Hie-
rusalem omnibus diebus vitæ tuæ:

Et videbis filios filiorum tuorū, pacem super Israel.

PARAPHRASIS.

Beatus ille, qui piam sese Deo

In seruitutem dedicat,

Semper paratus exequi, sanctissimis

Quod ille uerbis imperat:

Non is paterna rura inaniter colit:

Sed quæ feraci semina

Sinu reapiit fundus, illa maximo

Reddit colenti fœnore.

Vxor pudica bene regit domum, & optimis

Exornat ipsam liberis:

Fœunda vitis instar, apta diligens

Quam curat arte uinitor.

Proles nouella crescit, ut uirentibus

Oliua pulchra ramulis,

Et mensa turba garrula circumdata

Cumulat parentes gaudio.

Hæc est piorum uita, eosque talibus

Remuneratur præmiis

Summi benignitas patris: quem si coles,

Urbis sacratæ commodis

Letus fruëris, usquedum uinas, tuæ

Prolis beatæ liberos

Florere ærnes, patrijs fœlicitas

Regnabit almâ finibus.

ARGUMENTVM PSAL. CXXXIX.

Gratias agit Deo, quòd populum suum ab impijs
semper oppugnatum, saluum, incolumemque sem-
per conseruauerit.

Canticum graduum, Psalmus cxxxix.

Sæpe oppugnauerunt me à iuuentute mea, dicat nūc
Israel,

Sæpe oppugnauerunt me à iuuentute mea, attamen
non præualuerunt mihi.

Supra dorsum meum arauerunt arantes, prolonga-
uerunt sulcum suum,

Dominus iustus concidit funes impiorum: confun-
dantur & conuertantur retrorsum omnes qui ode-
runt Sion:

Fiant sicut herba tectorum, quæ, priusquam euella-
tur, exaruit:

De qua non impleuit manum suam qui metit, & si-

num suum qui manipulos colligit.
 Et nō dixerunt qui præteribāt, Benedictio Domini
 supervos, benediximus vobis in nomine Domini.

P A R A P H R A S I S.

Me barbarorum sæpe vexavit furor,
 Nunc sancta dicat ciuitas,
 Me barbarorum sæpe vexavit furor
 Ab ultima usque origine:
 Sed nulla uis, nec ullus hostium dolus
 Me quiuic unquam extinguere.
 Aruit heu mea terga longis uerberum
 Sulcis nefandus barbarus,
 Laboribus me, uinculisque asperrimis,
 Duraque vexavit fame:
 Sed uincla rupit ferrea, et tandem mihi
 Dulcem quietem præbuit,
 Vberimòque me locauit in solo
 Cælestium summus pater.
 Qui ciuitatem numinis sanctissimi
 Vult perditam, pereat male,
 Vt herba tellis orta summis ædium,
 Humore uitali caret,
 Nec quit profundiore radices humo
 Agere: itaque antè exaruit
 Percussa sole feruido, quàm dextera
 Vellatur alicuius: neque
 Manum repleuit ea metens, suum neque
 Sinum, manipulos colligens:
 Nec qui uiator præterit, uerbis ei
 Bene precatur optimis,

D.i.

*Talis sit impius hostis, & quisquis pius
Odit, Deus quos diligit.*

ARGUMENTVM PSAL. CXXX.

Precatio est hominis conscientia peccatorum gra-
uissime cruciati, seque misericordiæ diuinæ fiducia
consolantis.

Canticum graduum, Psal. cxxx.

De profundis clamaui ad te Domine, Domine exau-
di vocem meam.

Fiant aures tuæ intendentes in vocem deprecationis
meæ.

Si iniquitates obseruaueris Domine, Domine quis su-
stinebit?

Quia apud te propitiatio est, propterea timeris. expe-
ctauit Dominum,

Expectauit anima mea, & in verbo eius speravi, ani-
ma mea Dominum | expectat |

Magis quàm custodes mane, quàm custodes mane.
speret Israel in Domino,

Quia apud Dominum misericordia, & copiosa apud
eum redemptio,

Et ipse redimet Israel ex omnib⁹ iniquitatibus eius.

PARAPHRASIS.

Malis profundis obrutus

Tuam pater fidem inuocō,

Ne quæso supplicis tui

Audire uocem respue.

Si iudicaris omnia

Peccata, cunctaque exigas,

Quæ iure debentur tibi,
Quis sustinebit, o pater?
Quis tam pie, tam puriter
Vitam colit, quin sit tibi
Pœnas daturus maximas?
Incomparabilis tua
Certè benignitas facit,
Ut numen à mortalibus
Tuum colatur: hac ego
Confusus auxilium tuum
Expecto certum, animus meus
Et lenitate tua, & tua
Promissione nititur.
Non sic morantem languidus
Expectat auroram uigil,
Qui nocte tota sedulus
Ambiuit urbis mœnia,
Votis ut omnibus expeto
Ego te morantem o refugium
Meæ salutis unicum.
Iudæa gens Deo tuo
Confide: nam Deus tuus
Benignus & placabilis,
Et promptus est ignoscere.
Tua ipse peccata omnia
Delebit, & maculas sua
Absterget omnes dextera.

ARGUMENTVM PSAL. CXXXI.

Monet nos exemplo suo, fugiendam esse super-
biam & importunitatem, atque in sola Dei miseri-

D.ij.

cordia spem ponendam esse.

Canticum graduum, Psalmus c x x x i.

Domine non exaltatum est cor meum, neque elati
sunt oculi mei,
Neque ambulaui in magnis, neque in mirabilibus
super me.

Si non depressi, & humiliavi animam meam,
Qualis ab lactatus erga matrē suam, qualis ab lacta-
tus, talis in me anima mea.

Speret Israel in Domino ex hoc nunc, & vsque in
sæculum.

P A R A P H R A S I S.

*Supreme rector cælitum
Non ipse regum ob decus
Inflatus effror, neque
Perambulans sublimis
Mentis superbæ somniis,
Maiora uiribus meis
Tribuo, tribuere quàm deat
Hominem caducum, inanis &
Imaginis simillimum.
Si non modestam colo,
Si sumo magnos spiritus:
Turpissimæ arrogantiae
Pœnas grauissimas luam.
Qualis pusillus est puer,
Quem lacte dulci blandula
Vix alere desit parens,
Talis animus, & mens mea est.
Vt ille totus optima*

Matre acquiescit in sua,
 Sic ipse toto pectore
 Ex charitate pendeo
 Cælestis optimi patris.
 O te beatum, quisquis es,
 Qui spem tuam in Deo locas.

ARGUMENTVM PSAL. CXXXII.

Describit studium Davidis in parando loco, vbi templum ædificaret. Inducitur etiam Deus loquēs, ac promittens, familiam Davidis sempiterno regno porituram: quod quidē perfectum est CHRISTO rege cælitum, atque hominum constituto.

Canticum graduum, Psal. cxxxii.

Memento Domine David, & omnis mansuetudinis eius,

Qui iuravit Domino, votum vouit Deo Iacob,
 Si introiero in tabernaculum domus meæ, si ascen-
 dero in lectum strati mei,

Si dederò somnū oculis meis, & palpebris meis dor-
 mitationem,

Donec inueniam locum Domino, tabernaculū Deo
 Iacob.

Ecce audiuiimus eum in Ephrata, inuenimus eum in
 campis syluæ.

Introibimus in tabernaculum eius, adorabimus an-
 te scabellum pedum eius.

Surge Domine in requiem tuam tu, & arca fortitu-
 dinis tuæ,

Sacerdotes tui induantur iustitia, & sancti tui exul-
 tent.

D. ii.

Propter David seruum tuum ne auertas faciem
Christi tui.

Iurauit Dominus David veritatem, & non frustra-
bitur eam, De fructu ventris tui ponam super se-
dem tuam.

Si custodierint filii tui testamentum meum, & testi-
monia mea, quæ docebo eos,

Etiā filii eorum vsque in sæculum sedebūt super
sedem tuam,

Quoniam elegit Dominus Sion, desiderauit eam in
habitationem sibi

Hæc requies mea in sæculum sæculi, hîc habitabo,
quoniam concupiui eam.

Victum eius benedicens benedicam, pauperes eius
saturabo panibus,

Sacerdotes eius induam salutari, & sancti eius exul-
tatione exultabunt.

Illic germinare faciam cornu David, parauit lucer-
nam Christo meo.

Inimicos eius induam confusione, super ipsum au-
tem effloreat diadema eius.

P A R A P H R A S I S.

*Sis memor usque p̃j rex maxime Davidis, & quàm
Ciues in omnes mitis extiterit suos.*

Ille tui sancto incensus iurauit amore,

Votumque lingua nuncupauit hoc modo,

Ne tibi sim charus iusta mihi charior ipsa,

Ne uerba posthac supplicantis audias,

Antè meæ si chara domus ad limina adibo,

Oculosue somnus antè clauserit meos,

Quàm præclara tuo fuerit pater optime templo,

Tuisque dedicata sacris area,

Sic ait, & paruo post tempore dedicat illam,
 Qua se beatis sylua campu porrigit,
 Cum tu clara prius Bethlehemi signa dedisses.
 Tuam introibimus Pater domum, tua
 Perpetuo castis uenerantes numina sacris:
 Tu mansionem dexter ad certam ueni,
 Mysticaeque arca uagam stabili iam sede quiescat:
 Fac ut sacerdos mente pura te colat,
 Et sua cuique pio da gaudia: né ue tueri
 Omite prolem Dauidis tui inclytam,
 Quam patris aurato in solio tu sancte locasti.
 Iurauit ille, peierare qui nequit,
 Omnipotens dulci affatus sic Dauidem amore,
 Tua sedebunt sede liberi tui,
 Qui si constantes in religione manebunt,
 Quam Moysis ore sanximus, neque inclyta
 Fœderis antiqui uiolarint iura, nepotum
 Serie propago nobilis longissima
 Dulci pacæ fruens solio regnabit auito.
 Sionis arcem præfero cunctis locis,
 Hic ego longa libenti animo per sæcula degam,
 Hic supplicantium preces ego ciuium
 Audiam, & optanti mea sancta oracula pandam:
 Florebit agris fructuum lætissima
 Omnigenum ubertas, atque hinc procul omne fugata
 Per æuum egestas exulabit horrida:
 Casta sacerdotes ornabit uita, colentque
 Domos piorum pura semper gaudia.
 Ac ueluti lauro pulchræ densissima sylua
 Radice ab ima pullulat, sic Dauidi
 Candida suarescet proles, quæ splendida facta
 D.iii.

Parentis augeat optinū, neque hostium
 Vlla domum poterit vis hanc euertere, non si
 Coniuret omnis impiarum gentium
 Barbaries latas per terras didita cunctis
 Optatus ille pijs fluet ab origine
 Ista, qui populos omnes, & maxima ponti
 AEquora, globosque syderum micantium,
 Et diuos supra cæli conuexa morantes
 Mecum gubernet sempiterna ad sæcula.

ARGVMENTVM PSAL. CXXXIII.

Commendat concordiam, & sanctam animorum
 inter se coniunctionem.

Canticum graduum, Psal. c x x x i i i.
 Ecce quàm bonum, & quàm iucundū habitare fra-
 tres in vnum.
 Sicut vnguentū optimū super caput [effusum] quod
 descendit in barbam, barbam Aaron,
 Quod descendit in oram vestimentorum eius, sicut
 ros Hermon, qui descendit in montes Sion:
 Quoniam illic mādauit Dominus benedictionem,
 & vitam vsque in sæculum.

PARAPHRASIS.

O quàm beatum est pacis insolubili
 Fratres ligari uinculo!
 O qualia bona, & quanta secum gaudia
 Apportat alma charitas!
 Quales odores spirat unguenti liquor
 Stillans Aaronis sacro
 E verticæ aureas adoras uestium,

Tales odores candida
 Pax, atque amoris mutui concordia
 Afflant piorum mentibus.
 Ut ros Sionis decidens, iugum, & auiæ
 Hermonis alti pascua
 Fœcundat: ita quas incolit domos pia
 Pax, ditat omnibus bonis.
 Nam degit ubi pax & beata charitas,
 Ibi cœlitum degit Pater.

ARGUMENTVM PSAL. CXXXIIII.

Hortatur Leuitas, & alios viros religiosos, qui noctu vigilas agebāt in tēplo, vt precibus atque hymnis Deum venerentur.

Canticum graduum, Psal. cxxxiiii.

Ecce benedicite Dominū omnes serui Domini, qui
 statis in domo Domini.
 In noctibus extollite manus vestras ad sancta, & benedicite Dominum.
 Benedicat te Dominus ex Sion, qui fecit cælum & terram.

PARAPHRASIS.

Dum nox fauet, suoque nos silentio
 Inuitat, agite, laudibus
 Deum efferamus ædis ô sanctissimæ
 Casti, beati que incolæ.
 Tollamus agite supplices simul manus,
 Adytisque in intus Deum.
 Aures amcas applicantem plurima
 Prece inuocamus, ut sua

*Ope sospitet ciues, bonique det omnia
Largæ benignus dextera.*

ARGUMENTVM PSAL. CXXXVII.

Gens Hebræa in Babyloniam abducta commemorat hoc dulcissimo carmine luctū & mœrorem suū, & prædicit excisionem imperii Chaldæorum.

Psalmus CXXXVII.

Iuxta flumina Babylonis sedimus & fleuimus, cum recordaremur tui Sion.

In salicibus in medio eius suspendimus citharas nostras,

Quia illic petierunt à nobis, qui captiuos duxerant nos, verba cantionum,

Et pro ululatu nostro lætitiā, Cantate nobis de canticis Sion.

Quomodo cantabimus canticum Domini in terra aliena?

Si oblitus fuero tui Hierusalē, obliuiscatur [artis suæ] dextera mea

Adhæreat lingua mea faucibus meis, si non meminerō tui,

Si non posuero Hierusalē in principio lætitiæ meæ.

Memor esto Domine filiorū Edom, in die Hierusalē Dicentiū, Exinanite, exinanite vsque ad fundamentum in ea.

Filia Babylonis misera: beatus qui retribuet tibi retributionem tuam, quam retribuisti nobis.

Beatus qui tenebit, & allidet paruulos tuos ad petram.

P A R A P H R A S I S.

Dum nos ferarum gentium crudelitas
 Desideratæ patriæ dulci solo
 Exterminatos detinet, iuvat procul
 A ciuitatis barbara frequentia
 Sedere solos sola propter littora
 Euphratis. hîc comantium nostras lyras
 Suspendimus ramus salicum, & uberrimam
 Vim lachrymarum fundimus, tui Sion
 Dulcis recordantes, tuâque maxime
 Rex cælitum orantes opem ore supplici.
 At interim adiens pastor errantis gregis,
 Cantate nobis, ait, aliqua de canticis
 Vestris. quid istæ pendulæ tacent lyrae?
 Quî nos queamus obsecro animum inducere,
 Vt canticum sanctissimum nostri Dei
 Cantemus istis exulantes in locis?
 Si oblitus unquam fuero sancta ciuitas
 Tui, mea quoque oblita dextra psallere,
 Amabiles nunquam lyra eliciat sonos:
 Adhæreat lingua mea faucibus meis,
 Ne canere possim, nisi ego meminero tui,
 Nisi cuncta æerba erunt mihi, & amarissimo
 Amariora felle, donec mœnia
 Tuûmque templum restituta uidero.
 At tu, nefanda facta qui mortalium
 Vltriciæ punis dextera, teterrimi
 Idumæorum sceleris usque sis memor,
 Qui dum periret ciuitas tua, impios
 Hostes furentes uocibus nefarijs
 Sic incitabant, Pergite agedum, & omnia

*Vastate, ferro & igne cuncta euertite.
 Babylon superba, & omnium miserrima:
 Beatus is qui talibus pro iniurijs
 Te digna soluet præmia, atque idem tibi
 Large reponet, paruulos à pectore
 Natos reuellens matrum, & illos aspera
 Ad saxa frangens, teque funditus eruens.*

ARGVMENTVM PSAL. CXLI IIII.

Gratias agit Deo, cuius benignitate hostes bello superare soleat, & ipsius auxiliũ implorat aduersus impias nationes.

Psalmus Dauid CXLI IIII.

Benedictus Dominus fortitudo mea, qui docet manus meas ad prælium, & digitos meos ad bellum.
 Misericordia mea & refugium meum, adiutor meus & liberator meus,
 Clypeus meus, & in ipso speraui, qui subdit populũ meum sub me.
 Domine quid est homo, quòd agnoscis eum? filius hominis, quòd reputas eum?
 Homo vanitati similis est, dies ei' sicut vmbra præteriens.
 Domine inclina cælos tuos, & descende: tange montes, & fumigabunt:
 Fulgura fulgur, & dissipa eos: mitte sagittas tuas, & disturba eos:
 Demitte manum tuã ex alto: eripe me, & libera me de aquis multis, & de manu filiorũ alienigenarũ,
 Quorum os locutum est vanitatẽ, & dextera eorum dextera iniquitatis.

Deus canticum nouum cantabo tibi, in psalterio,
& decachordo psallam tibi.

Qui das salutem regibus, qui redemisti Dauid seruum tuum de gladio maligno, eripe me,

Et erue me de manu filiorum alienigenarum, quorum os locutum est vanitatem, & dextera eorum dextera iniquitatis:

Vt sint filii nostri sicut plantulae crescentes in iuuentute sua,

Filiae nostrae sicut anguli ornati ad similitudinem templi.

Proptuaria nostra plena sint, eructantia ex vno genere annonae in aliud,

Greges nostri mille pariant, pariant decem millia in compitis nostris, boues nostri sint ferendis oneribus apti.

Non sit interruptio, non emigratio, non clamor in plateis nostris.

Beatus populus, cui haec sunt, beatus populus cuius Deus est Dominus.

P A R A P H R A S I S.

*A*Eterne mundi Domine quas grates tuae

*C*lementiae possim agere, uel tuum quibus

*E*fferre nomen laudibus sanctissimum?

*T*u praeliari dexteram meam doces,

*E*t omnium discriminum fidiissimus

*C*omes per hostes obuios, & horrida

*P*er arma tutum rueres, & incolumem facis.

*T*u ciuitates subijcis meas mihi,

*L*atisque donas imperare gentibus.

*D*omine quid est homo, quod honore maximo

*D*ignaris illum, & tam benigne amplecteris?

Homo est imago uana, et umbræ somnium
 Inanis, ipsa inanitate inanior.

De cæde cælo, et irruentes hostium
 Aces cœræ fulminante dextera,
 Illos procellis, igne, grandine dissipa,
 Illos sagittis perime, nōsque iam obrutos
 His nationum barbararum fluctibus
 Tuere. summe rex tuas laudes ego
 Cantabo semper: tibi cithara semper mea
 Hymnos sonabit. tu salutem regibus
 Donare gaudes, Dauidem tu maximis
 Periculorum liberaſti caſibus:

Tu nunc furores impiarum gentium
 Compeſce, quas neſanda ſemper dicere
 Iuuat, neſanda ſemper agere. fac, pius
 Miles triumphum nobilem referat domum,
 Fac, alma pax, quæſque noſtris finibus
 Regnent tumultu barbarorum liberae.
 Proles nouella creſcat agris omnibus,
 Ut ualle myrtus aua nacentibus
 Se ramulus ſubiicit, a neu limpidi
 Rigata fontis lymphula: ſint uirgines
 Noſtræ decoro corpore ſpectabiles:
 Sint plena ſemper horrea bonis frugibus,
 Plenus redundet cælla ſemper dolijs,
 Redundet oleo, melle, pomis dulcibus:
 Sint prata gregibus tecta fecundiſſimis,
 Fortes iuueni pluſtra onuſta ducere,
 Fortes feraem glebam aratro findere.
 Neu ſæuus hoſtis noſtra rumpat mœnia,
 Neu patriæ incundæ amabiles agros

Abducta gens relinquat, aut ciuilibus
 Sonent plateæ iurgis. Ter, & amplius
 Beata gens, quæ talibus fruitur bonis,
 Beata gens, quam maximus cælestium
 Pater suo præsens tuctur numine.

Ad lectorem.

Hæc nostra lector Christiane carmina
 Sic temperauimus fauente numine
 Diuino, ut ipsa cum legas, sit idem ferè,
 Ac si poetæ Davidis sanctissimi
 Hymnos legas. tametsi enim neque reddita
 Fuere uerbis uerba, neque nobis fuit
 Relligio, multa addere: bonam, & certam tamen
 Spem habemus, additum nihil quod ab ipsius
 Abhorreat sententia uatis, nihil
 Obscura quod non monstret, instar luminis,
 Aut pulchritudini poematis aliquid
 Decoris addat: uirgini pulcherrimæ
 Quale decus addunt arte purpureæ rosæ,
 Violæque flauis crinibus circumdatæ.
 Quod si labores hos meos perspexero
 Fuisse gratos, & legentium fauor
 Scribentis adiuerit, ut æquum, industriam:
 Vtrò recipio, & tibi meam astringo fidem,
 Curam mihi hanc unam fore antiquissimam,
 Ut quæ reliqua sunt Davidis poemata,
 Oratione pura, & arte musica
 Ornata possint mox Latinis auribus
 Intelligi. hoc ego ut queam cito exequi,
 Utinam optimi faueat benignitas Dei,

Quod oro, uotisque omnibus equidem expeto,
Non in meæ, sed in ipsius spem gloriæ.

AD ALEXANDRVM FARNE-
sium Cardinalem amplissimum.

Dum se alij mediæ per amica silentia noctis
Dulci sopore recreant,
Hæc ego Iessiadæ cithara mage dulcia somno
Meditans canebar, dum dies
Clara superueniens taciturnas pelleret umbras,
Charissimas umbras mihi,
Quæ me senserunt noctes uigilare beatas,
Dum primus ipse mystica
Davidis ad Latias deduco carmina musas,
Pisq; grata concinno:
Non Iouis insani referens male sanus amores,
Non ebriosa Liberi
Orga, non ludos Phæbi, execrandæue sacra,
Sed maximi laudes Dei,
Tergeminum quem cælicolæ uenerantur & unum,
Qui syderum uagantium
Multiplices cursus, qui magnum temperat æquor,
Et omnium mortalium
Omnia facta uidens sua iustis præmia reddit,
Suasque pœnas improbis
Irrogat, & cunctas animalia cuncta per oras
Alit benigno numine.
O utinam hæc discant pueri, castæque puellæ,
Mentèsque sanctioribus
Formantur studijs, dum parua & mobilis ætas.

Quid o parentes, quid inuat,
 Futilibus nugis & turpi carmine vestros
 Contaminare liberos,
 Cum liceat sanctis illis uersare poetas,
 Scientiæque pabulo
 Diuinæ teneros animos nutrire, ueneno
 Dulci relicto, quo malo
 Nullum aliud magis esse nocens puerilibus annis,
 Videre prisca sæcula:
 Quauis illa forent caligine consita, necdum
 Perfusa uero lumine?
 At tu prudentem iuuenili ætate senectam
 O patriæ decus inclytæ
 Farnesi æquiparans, post magna negotia, quando
 Audire fessus nobiles
 Regum legatos summis de rebus, amænos
 Mirandula doctissimo,
 Maphæoque tuo conutatus, te abdis in hortos,
 Et otio dulci inuat
 Mollibus & studiis duos finire labores:
 Tunc nostra quaeso carmina
 Perlege: nec tu Flamini magis illa putato,
 Quàm regis illustrissim,
 Qui bello insignis, pietate insignior, hostes
 Inter, ferociæque agmina,
 Seu positis armis tranquilla pace quierat,
 Amore sancto percitus
 Aeterni regis laudes, & maxima facta
 Tali canebat carmine.

FINIS.

INDEX PSALMORVM QVI
hoc libello explanantur.

Ad Dominum cum tribularer,	xxxv.
Ad te leuauí oculos	xxxix.
Beatus vir qui non abiit	vi.
Beati omnes qui timent Dominum,	xlvi.
Benedictus Dominus Deus meus,	lx.
Cum conuerteret Dominus	xliii.
Domine quid multiplicati sunt,	ix.
Domine ne in furore tuo	xi.
Domine quis peregrinabitur	xix.
Dominus pascit me	xx.
De profundis clamaní	l.
Domine non est exaltatum	lii.
Exaltabo te Domine, quoniam	xxii.
Ecce quàm bonum	lvi.
Ecce benedicite Dominum	lvii.
In Domino confido	xiii.
Iubilare Deo omnis terra	xxix.
Iuxta flumina Babylonis	lviii.
Laudate serui Domini,	xxxvi.
Leuauí oculos meos	xxxvi.
Lætatus sum in iis,	xxviii.
Memento Domine Dauid,	liii.
Nisi Dominus fuisset	xli.
Nisi Dominus ædificauerit	xlvi.
Quemadmodum desiderat	xxv.
Qui confidunt in Domino,	xlii.
Quum exiret Israel	xxxiii.
Saluum me fac Domine,	xv.
Sæpe oppugnaverunt me	xlvi.
Vsquequo Domine	xvii.

F I N I S.

EXCVDEBAT ROB. STEPHA-
NVS TYPOGRAPHVS REGI-
VS, PARISIIS, ANN. M. D. XLVI.
X. CAL. IVN.

1232.6

99 963687





1252.6





